

“Europeada 2020”: preparatifs

I “Ladins” a Lags (tod. “Laax”) ti Grijuns por recordé i 5 agn dla lia CBR y pié ia cun i preparatifs por se presenté bun te dui agn



La squadra ladina cun l'acompagnadù y le coordibnadù di Ladins al'Europeada Giorgio Costabiei.

Mendranzes - Ai 7 de messé 2018 el gnù festejé ti Grijuns a Lags i 5 agn dla CBR (Cultura Ballapé Rumantsch) che é l'organisaziun dla squadra dl palé di éi y dles ères dl Ciatun Grijun.

Te chësta ocajun el ince gnù recordé i 10 agn dla Europeada, che

è gnüda organisada le pröm iade tl 2008 avisa ti Grijuns.

La CBR á invié por festejé chësc avenimënt la squadra ladina maschila a na partida amicala y festa culturala. Ince les ères rumantsches á soghé

chël de cuntra la squadra dles ères Sorbes tla Germania. La partida inanter i rumanc y i ladins é jüda fora 2 a 2.

Da sëra el sté na festa culturala inanter les trëi mendranzes

linguistiches. Vigni grup á porté val' de particular da bère y da mangé da súa regiun. Al é ince gnù porté dant cianties ti trëi lingac desferënc. An pó odëi indò te chësta ocajun che le palé y le sport á n significat important tles mendranzes y cultures desvalies.

Te 2 agn saral la proscima EUROPEADA, tla Carencia dai Slovens. I Ladins y les Ladines á indò la poscibilité da se presenté cun súa cultura y so lingaz deboriada cun d'atres tröpes mendranzes linguistiches tl'Europa. (usc)



Les döes scuadras dla partida maschila: i Rumanc y i Ladins.